

Ака́фист преподо́бному Севастиáну Карага́ндинскому, испове́днику

Конда́к 1

Избра́нный преёмниче благода́ти ста́рчества О́птинскаго, в годи́ну гоне́ний лю́тых кро́ткий за ве́ру Правосла́вную страда́льче, гра́ду Карага́нде богода́рованный свети́льниче и всея́ страны́ Казахста́нския неусы́пный храните́лю, Це́ркве Ру́ския похва́ло и всех христоиме́нитых люде́й ра́дование, ублажа́ем по́двиги тво́я и с любóвию вопи́ем ти: Ра́дуйся, преподо́бне о́тче Севастиáне, ве́ры Правосла́вныя испове́дниче.

И́кос 1

А́нгелов Творе́ц в послед́ня времена́ показа́ тя, преподо́бне о́тче, ра́вна А́нгелом невеще́ственным тво́им жити́ем, священнотай́нника же благода́ти, бу́дущая́ яко́ настоя́щая прозира́юща, и испове́дника твёрда, гоне́ния бо и муче́ния за Христа́ претерпе́л еси́; те́мже воспева́ем тебе́ сицевáя:

Ра́дуйся, роди́телей благочести́вых о́трасле благоухáнная;
ра́дуйся, изде́тка благода́тию Духа Свята́го просвеще́нный.
Ра́дуйся, благоче́стию роди́тельскому́ измла́да поревновáвый;
ра́дуйся, во о́трочестве́ ко ста́рцу О́птинскому́ Амвро́сию на благослове́ние приведе́нный.

Ра́дуйся, притру́дное ино́ческое жити́е вседу́шне возлюбíвый;
ра́дуйся, хранити́ чисте́ запове́ди Бо́жия измла́да себе́ положи́вый.
Ра́дуйся, от ю́ности тво́ея́ вся́ ми́ра сегó кра́сная Бо́га ра́ди презре́вый;
ра́дуйся, во оби́тель О́птинскую́ ста́рческаго́ ра́ди наставле́ния прише́дый.

Ра́дуйся, во́ли сво́я́ всесовершенство́е отверже́ние показáвый;
ра́дуйся, наста́вником духо́вным смире́нно себе́ покорíвый.
Ра́дуйся, преподо́бнаго́ Ио́сифа кро́ткий учени́че и послу́шниче;
ра́дуйся, ста́рца́ богоно́снаго́ Некта́рия сподви́жниче и сота́инниче.
Ра́дуйся, преподо́бне о́тче Севастиáне, ве́ры Правосла́вныя испове́дниче.

Конда́к 2

Ви́дя предивный́ Некта́рий, яко́ кро́тости ра́ди тво́ея́ и смире́ния дарова́ ти Небе́сный Дарода́тель благода́ть прозре́ния духо́внаго, преёмника́ своего́ ты наре́че, «ле́то» имену́я, милосе́рден бо к

страждущим явился еси; темже научаемся всех благих Промыслителю пети: Аллилуиа.

Їкос 2

Разум благодатию Духа Святаго просвещен, имея, евангельски Бога возлюбил еси, светную же славу мирскую оставль, Оптинския пристани достигл еси, идеже последовал еси Христу со духовными наставники твоими, житию постническому прилежа во смирении; сего ради вернии воспеваем ти:

Радуйся, тесный и прискорбный путь паче пространного возлюбивый;

радуйся, многмятежие мира лестнаго презревый.

Радуйся, яко боголюбезную чистоту душевную и телесную сохранил еси;

радуйся, яко постом и молитвою тленная на нетленная пременял еси.

Радуйся, яко постным воздержанием плоть твою духови покорил еси;

радуйся, яко послушанием и безмолвием страсти душевныя умертвил еси.

Радуйся, яко слезами покаяния землю сердца твоего напоил еси;

радуйся, яко земная отринув, ум твой к Небесным возвел еси.

Радуйся, яко сладчайшее имя Иисусово во уме твоём присно носил еси;

радуйся, яко Святых Святейшим Словом, Христом, Превечнаго Бога Отца познал еси.

Радуйся, яко благодать Утешителя чистотою сердца твоего стяжал еси;

радуйся, яко силу прозрения и старчества от Бога приял еси.

Радуйся, преподобне отче Севастиане, веры Православныя исповедниче.

Кондак 3

Силою благодати Божия старцы святии Оптинстии вождаху ты тесным путем жития иноческаго, да и жребий пастырский и подвиг исповедания Христа Распятаго и Воскресшаго послежде воспримеши, Емуже во всем житии твоём воспевал еси: Аллилуиа.

Їкос 3

И́мый в се́рдце твоём ве́ру твёрду, наде́жду же несумне́нну и лю́бовь и́стинну ко Христу́ Бо́гу на́шему, егда́ воздвиго́ша богобо́рнии гоне́ние на Це́рковь Госпо́дню, смире́нне и со тре́петом свяще́нства дар чрез возложе́ние рук архиере́йских прия́л еси́, да спасу́тся от злосра́днаго безбо́жия ги́бнущи; те́мже воспису́ем ти тако́вая:

Ра́дуйся, Христу́, До́брому Па́стырю, усер́дне послужи́вый;
ра́дуйся, священно́таинниче Христо́в, дара́ми Ду́ха Свята́го просия́вый.

Ра́дуйся, ду́шу твою́ за словесны́я о́вцы Госпо́дни полага́вый;
ра́дуйся, путь спаси́тельный взыску́ющим Ца́рствия пропове́давый.
Ра́дуйся, к го́рнему Иерусали́му лю́дем вождю́ богому́дрый;
ра́дуйся, во благо́честии тружда́ющимся наста́вниче богодарова́нный.

Ра́дуйся, обуре́ваемым страстьми́ грехо́вными до́брый ко́рмчий;
ра́дуйся, немощны́м и неиску́сным учи́телю терпели́вый.
Ра́дуйся, изнемога́ющим от уны́ния и печа́ли благода́тное утеше́ние;

ра́дуйся, беспомощным скоро́послушли́вый помо́щниче.

Ра́дуйся, чернори́зцем предивны́й о́тец и ста́рец прозорли́вый;
ра́дуйся, уста́вов О́птинских храните́лю ре́вностный.

Ра́дуйся, преподо́бне о́тче Севастиа́не, ве́ры Правосла́вныя испове́дниче.

Конда́к 4

Бу́ри гонений лю́тых, безбо́жною вла́стию воздвига́емья, не убо́явся, со все́ми новомученики и испове́дники Це́ркве Ру́сския́ и́го на себе́ благо́е Христо́во подъя́л еси́ и суро́вых степе́й Казахста́нских дости́гл еси́, иде́же безчи́сленное мно́жество страда́лец безви́нных го́рькою сме́ртию сконча́шася; о́ ихже упоко́ении А́гнцу Бо́жию, о́тче благосе́рде, моли́твы приноси́л еси́, надгробно́е рыда́ние творя́ песнь: Аллилу́иа.

И́кос 4

Слы́ша, я́ко по всей земли́ Ру́сстей ча́да церко́вная за ве́ру оте́ческую Правосла́вную сме́рть лю́тую и жесто́кая гонения́ прие́млют, смире́нне в путь ско́рбный поте́кл еси́ и зи́му го́рькую, и пусты́нную тяготу́ ле́тнюю, и я́рость о́гненную мучений узи́лищных терпе́нием твои́м препобеди́л еси́, сла́дости духо́внаго блаже́нства ве́чнаго вкуси́в; сего́ ра́ди вопие́м ти сицевая́:

Ра́дуйся, нището́ю духо́вною Ца́рства Небе́снаго насле́дивый;

ра́дуйся, пла́чем о гресѣхъ утешѣние Христо́во прие́мый.

Ра́дуйся, я́ко а́лчбою и жа́ждею пра́вды Бо́жия нетле́нныя пи́щи Небе́сныя насы́тился еси́;

ра́дуйся, я́ко ми́лостию е́же к бли́жним сострада́ния ми́лость Бо́жию восприя́л еси́.

Ра́дуйся, во страда́ниях твои́х чи́стым се́рдцем Бо́га узре́вый;

ра́дуйся, вражду́ющия умиротворя́й, те́мже и сын Бо́жий нарече́нный.

Ра́дуйся, изгна́нием пра́вды ра́ди Ца́рства Небе́снаго приобщив́ыйся;

ра́дуйся, в поноше́нии и злосло́вии от нечестивы́х во Христа́ облекы́йся.

Ра́дуйся, Божѣ́ственному Промы́шлению себѣ ко́нечне вручи́вый;

ра́дуйся, во изгна́нии от земна́го Оте́чества Ио́сифу прекра́сному подража́вый.

Ра́дуйся, в терпе́нии боле́зней и скорбе́й Ио́влеву крѣпость показав́ый;

ра́дуйся, в крѣ́тком терпе́нии гонѣ́ний Дави́дово смире́ние яви́вый.

Ра́дуйся, преподо́бне о́тче Севастиа́не, ве́ры Правосла́вныя испове́днице.

Конда́к 5

Боготе́чная звезда́, О́птинскими ста́рцы возжже́нная, яви́лся еси́, о́тче Севастиа́не досточу́дне: умо́м бо чи́стым, се́рдцем же смире́нным и душе́ю крѣ́ткою службу́ Бо́гу принося́, бе́ды претерпе́л еси́, и гонѣ́ния, и боле́зни испове́дания ра́ди Божѣ́ственныя И́стины, ю́же жити́ем и словеса́ твоими́ всем во у́зах и изгна́нии су́щим явля́л еси́, немощны́я укрепля́я и ве́рныя воздвиза́я благодарне пе́ти Бо́гу: Аллилу́иа.

И́кос 5

Ви́девше у́зницы крѣ́тость и любѣ́вь твою́, удивля́хуся кра́йнему терпе́нию твоemú. Мы же, ве́дяще многотру́дная страда́ния твоя́ и боле́зни, ублажа́ем тя, апо́стольски во узи́лищи благовестивша́го, и помраче́нныя смы́слы челове́ков просветивша́го, и и́же пре́жде диа́волом уловле́нныя ко Христу́ приве́дша́го, и благодарне зове́м ти:

Ра́дуйся, крине́ благоуха́нный, в пусты́нях Карага́нди́нских процветы́й;

ра́дуйся, хри́стоподража́тельными добродѣ́телями иссо́хшия ду́ши исцели́вый.

Ра́дуйся, неяде́нием и жа́ждею надол́зе в темни́це томимый;
ра́дуйся, в лиш́ениих сих Христа́ тебе́ пособ́ствующа обретьи́.
Ра́дуйся, николи́же по́стнаго воздер́жания оста́вивый;
ра́дуйся, моли́твою к Бо́гу при́сно пламене́й.
Ра́дуйся, благода́тию Ду́ха Свята́го невиди́мо укрепля́емый;
ра́дуйся, си́лою ея́ лю́ди заблудши́я от диа́вольския се́ти изыма́й.
Ра́дуйся, ко еди́ней, Святе́й, Соборне́й и Апосто́льстей Це́ркви
зablужда́ющия приводя́й;
ра́дуйся, пока́нию и́стинному и благочести́вой жи́зни их навча́й.
Ра́дуйся, пре́жде бесовом́ служивши́я ко Христу́ обрати́вый и
спасый́;
ра́дуйся, тем плач неуте́шный духовом́ зло́бы поднебе́сныя
наведый́.
Ра́дуйся, преподо́бне о́тче Севасти́ане, ве́ры Правосла́вныя
испове́дниче.

Конда́к 6

Пропове́дует страна́ Казахста́нская, прие́мши в зе́млю свою́ то́ки
крове́й новомучеников Це́ркве Ру́сския, равноа́нгельное твоё жити́е,
равноапосто́льныя тру́ды тво́я и чуде́с мно́жество, преподо́бне ста́рче
Севасти́ане испове́дниче, навча́ющи ве́рных Подвигополо́жнику
Христу́ Иису́су пе́ти: Аллилу́иа.

И́кос 6

Возсия́ всем лю́дем казахста́нским от гра́да Караганды́ свети́льник
добродете́лей твои́х, о́тче Севасти́ане: ты бо, я́ко о́блак све́тел и
росоно́сен яви́лся еси́, пла́мень пра́ведно дви́жимаго на ны за грехи́
наша́ гнева́ небе́снаго утиша́я, изсо́хшая серде́ца́ наша́ оживля́я и
плоды́ добродете́лей приноси́ти помога́я всем воспева́ющим ти
тако́вая:

Ра́дуйся, беспло́дную пусты́ню Казахста́нскую пло́дами
добродете́лей твои́х облагоуха́вый;

ра́дуйся, град Караганду́, я́ко ме́сто страда́ний благочести́вых
христиа́н се́рдцем возлюбивый.

Ра́дуйся, во и́мя Пресвяты́я Богоро́дицы пречу́дный храм та́мо
устроивый;

ра́дуйся, в том в па́мь сита́ Опти́нскаго приде́л Крести́телю
Иоа́нну воздвигну́вый.

Ра́дуйся, в хра́ме сем, я́ко в но́вей оби́тели Опти́ной, вся
благоле́пно учинивый;

ра́дуйся, в моли́тве и ста́рчеством о душа́х попече́нии нелёстно подвиза́выйся.

Ра́дуйся, я́ко во дни и в но́щи во бде́нии прі́снем пребыва́л еси́;
ра́дуйся, я́ко мно́гия и́ноки и иере́и, от гони́телей разсе́янные, на ме́сте сем собра́л еси́.

Ра́дуйся, я́ко миря́н мно́жество под благода́тный кров Цари́цы Небе́сных приве́л еси́;

ра́дуйся, я́ко мона́хом наста́вник прему́дрый яви́лся еси́.

Ра́дуйся, я́ко и все́му ста́ду твое́му па́стырь и учи́тель предоб́рый был еси́;

ра́дуйся, не я́ко господа́ствуяй, но я́ко служи́ай со обра́щенными тобо́ю пожи́л еси́.

Ра́дуйся, преподо́бне о́тче Севасти́ане, ве́ры Правосла́вныя испове́днице.

Конда́к 7

Хотя́ Оте́чества Небе́снаго дости́гнути, а́ще и пе́рстною плото́ю обложе́н, оба́че дух твой моли́твою воскриля́л еси́ и, к Бо́гу умо́м твои́м восходя́, го́рняя доброто́ы зрел еси́ сла́ву, со все́ми А́нгельскими си́лами воспева́я Бо́гу: Аллилу́иа.

И́кос 7

Но́ваго тя граждани́на Иерусали́ма Го́рняго Вы́шний Царь показа́, ми́ра бо красна́я вся, я́ко тле́нная, ни во что же вмени́л еси́, пусты́нное жити́е со ста́рцы равноа́нгельными предпочита́юща, и души́ одея́ние чистото́ю убели́в, и в ри́зу священства обле́кся, поноше́ния и гоне́ния Христа́ ради́ с ра́достью претерпе́л еси́, зане́же украси́лся еси́ дара́ми Ду́ха предивными; отню́ду же ве́рнии научи́шася пе́ти ти:

Ра́дуйся, от ю́ности в зако́не Господа́ни поуча́выйся;

ра́дуйся, во и́ночестве жити́и невеще́ственным чи́ном уподо́бивыйся.

Ра́дуйся, духоно́сных ста́рцев О́птинских и всех преподо́бных сли́ковниче;

ра́дуйся, добропобе́дным му́чеником и испове́дником Христо́вым соприча́стниче.

Ра́дуйся, Бо́жиих священнота́инников благоговей́ный сослужи́телю;

ра́дуйся, страда́льцев безви́нных му́жественный предста́телю.

Ра́дуйся, па́стырю, ду́шу за ста́до твое́ положи́ти гото́вый;

ра́дуйся, мно́гия му́ки и злохуле́ния за Христа́ претерпе́вый.

Ра́дуйся, твёрдое ве́ры испове́дание непрекло́нне яви́вый;
ра́дуйся, вся ве́рныя во благоче́стии изря́дне укрепивы́й.
Ра́дуйся, скорбьми́ мно́гими в ра́дость Го́спода вше́дый;
Ра́дуйся, ра́дость о́ную всем приходя́щим к тебе́ обильно́ пода́й.

Ра́дуйся, преподо́бне о́тче Севастиа́не, ве́ры Правосла́вныя испове́днице.

Конда́к 8

Стра́нно чу́до бе, преподо́бне о́тче Севастиа́не, моли́тва тво́я, кро́тости и смире́ния испо́лнена: то́я бо све́том ви́ну озаря́емь, Христо́в ум стяжа́л еси́, неизглаго́ланная та́инства познава́я и бу́дущая прозира́я, всех же притека́ющих к тебе́ от бесо́вских нападе́ний свобожда́я и на путь и́стины наставля́я, вопию́щих к Бо́гу: Аллилу́иа.

И́кос 8

Весь жела́нием божество́нным объа́т был еси́, свяще́нне, и в светоза́рныя дни Пасха́льнаго торже́ства богоно́сною душе́ю твоёю в небе́сныя оби́тели возше́л еси́, иде́же Престо́лу Пресвяты́я Трои́цы со все́ми святы́ми предстои́ши и слы́шиши от нас похва́льная сия́:

Ра́дуйся, от земна́го торже́ства Пасха́льнаго в ра́дость Па́схи ве́чныя восше́дый;

ра́дуйся, на земли́ всеконече́нне греху́ умеры́й и на Небеси́ нетле́нней жи́зни приобщивы́йся.

Ра́дуйся, я́ко Святы́х Святе́йшему Иису́су Сладча́йшему во сла́ве ве́чной предстои́ши;

ра́дуйся, я́ко о всех чту́щих па́мять твою́ пред Ним ходата́йствуеши.

Ра́дуйся, сугубую́ благода́ть от Христа́ прие́мый и́щущим спасе́ния помога́ти;

ра́дуйся, да́ра сподобивы́йся неду́ги душе́вныя и телесны́я врачевати́.

Ра́дуйся, ми́лости Бо́жия стру́я неизсяка́емая;

ра́дуйся, ра́дости духо́вныя, тишины́ же и ми́ра исто́чнице неисчерпа́емый.

Ра́дуйся, све́тлый обла́че, зной страсте́й грехо́вных утоля́й;

ра́дуйся, росо́ благода́тная, сердца́ ве́рных ороша́ющая и веселя́щая.

Ра́дуйся, свети́льнице, све́том добродете́лей в но́щи ми́ра сего́ нам при́сно сия́й;

ра́дуйся, гро́зде виногра́да Христо́ва, благода́тию Ду́ха Всесвята́го пита́й нас и веселя́й.

Ра́дуйся, преподо́бне о́тче Севастиа́не, ве́ры Правосла́вныя испове́дниче.

Конда́к 9

Вся́кое естество́ А́нгельское удиви́ся твоему́ пресла́вному в Го́рняя восхожде́нию, пресве́тлыя бо оби́тели небе́сныя прия́ша тя, Севастиа́не прозорли́ве, я́ко но́ваго насельника, иде́же с безплóтными Силами и всеми святы́ми водворя́ешься и лику́еши, ко Го́споду взыва́я: Аллилу́иа.

И́кос 9

Вети́и суемудре́ннии послу́шаша гла́са человекоуби́йцы су́ща искони́ и о́тца́ лжи вся́кия диа́вола, и зверём дивии́м подо́бся, устреми́шася на Невесту́ чи́стую Христо́ву, Це́рковь Правосла́вную, ея́же яви́ тя Подвигополо́жник тогда́ свети́льника и изрядна́ испове́дника; те́мже воспева́ем ти любо́вию:

Ра́дуйся, муче́ний за испове́дание и́стиннаго Бо́га не устраши́выйся;

ра́дуйся, ду́шу твою́ за ве́ру Правосла́вную положи́ти не отреки́йся.

Ра́дуйся, преще́ний безбо́жныя вла́сти не убоя́выйся;

ра́дуйся, к познанию́ Бо́га во изгна́нии твоём и мучи́телей привести́ потща́выйся.

Ра́дуйся, изсо́хшую серде́ц их пусты́ню слезно́ю моли́твою твоёю напои́вый;

ра́дуйся, кро́тостию и терпе́нием семена́ Ева́нгельская в ду́ши их посе́явый.

Ра́дуйся, гро́зныя ту́чи те́мных их помысло́в си́лою моли́тв твои́х разсе́явый;

ра́дуйся, к пока́нию и сокруше́нию серде́чному тех приводи́вый.

Ра́дуйся, врата́ Ца́рствия Небе́снаго тем отверза́вый;

ра́дуйся, водо́ю от кла́дязя тех напо́яя, во́ду нетле́нную им подава́ый.

Ра́дуйся, от него́же у́зницы пи́щу и оде́жду ще́дре приима́ху;

ра́дуйся, его́же и ско́ти в зи́мний мраз тепло́м своим изрядне согрева́ху.

Ра́дуйся, преподо́бне о́тче Севастиа́не, ве́ры Правосла́вныя испове́дниче.

Конда́к 10

Спасе́ния иски́й, послéдовал еси́ Влады́це Христу́, испове́днице святы́й Севастиа́не, отве́ргся себе́ и взем крест свой, я́коже Госпо́дь рече́; те́мже смире́ния путе́м пости́гл еси́ высоту́ Небе́сную, Бо́гови люבו́вию поя́: Аллилу́иа.

И́кос 10

Стéну несокруши́му обрето́ша ты христоиме́ннии лю́дие земли Русския, по кончи́не бо сла́вней твоёй повсю́ду чудеса́ соверша́еши изря́дна, я́ко от Бо́га прие́мь вене́ц нетле́нен и сла́ву ве́чну; те́мже вси ве́рнии благода́рне воспева́ют тебе́ си́це:

Ра́дуйся, Христа́, Бо́жию Си́лу и Прему́дрость, твёрдо пред челове́ки испове́давый;

ра́дуйся, я́ко и Госпо́дь испове́да ты пред Отце́м Свои́м Небе́сным и святы́ми А́нгелы.

Ра́дуйся, блиста́нием Трисо́лнечно́го Све́та ны́не осия́нный;

ра́дуйся, сокро́вище моще́й твои́х в насле́дие ча́дом оста́вивый.

Ра́дуйся, я́ко мо́щи тво́я вся́кия ско́рби и боле́зни исцеля́ют;

ра́дуйся, я́ко ты́я в печа́ли су́щим и смуще́нии весе́лие прети́хое быва́ют.

Ра́дуйся, я́ко ты́я Воскресе́ние всео́бщее немол́чно возвеща́ют;

ра́дуйся, я́ко от моще́й твои́х уязвленнии беси́ отбега́ют.

Ра́дуйся, ча́ше, дары́ Бо́жия преизоби́льно изли́вающая;

ра́дуйся, сосу́де, ми́ро цельбоно́сное боля́щим источа́й.

Ра́дуйся, свети́льнице, су́щих во тьме и сени́ сме́ртней све́том Христовы́м озаря́ющий;

ра́дуйся, кади́ло, фимиа́м моли́тв богоприя́тных при́сно вознося́щее.

Ра́дуйся, преподо́бне о́тче Севастиа́не, ве́ры Правосла́вныя испове́днице.

Конда́к 11

Пе́ние благода́рственно Зиждите́лю прино́сим, я́ко дарова́ ты всем и́щущим спасе́ния твёрда засту́пника; те́мже, преподо́бне Севастиа́не, ру́ку по́мощи нам ско́ро ниспосли́, и грехми́ при́сно погружа́емых из глубины́ губи́тельныя изведи́, и прочее́ вре́мя жити́я в покая́нии сконча́ти сподо́би, да при́сно Бо́гови поём: Аллилу́иа.

И́кос 11

Светозáрное свети́ло, заря́ми немерца́ющего све́та Пресвяты́я Трои́цы сия́ющее, все́й земли́ Казахста́нстей яви́лся еси́, предивне, луча́ми добродете́лей твои́х тьму поги́бельную разгоня́я и тепло́тою богоприя́тных моли́тв твои́х сердца́ ве́рных согрева́я, и́же с любо́вию воспису́ют ти сицева́я:

Ра́дуйся, Казахста́нския страны́ благода́тное сокрови́ще и украше́ние;

ра́дуйся, Руси́ Правосла́вныя ра́дование и утеше́ние.

Ра́дуйся, пу́стыни О́птинския благопло́дное прозябе́ние;

Ра́дуйся, гра́да Карага́нды покрове́ и удобре́ние.

Ра́дуйся, многотеку́щая реко́, сердца́ на́ша спаси́тельным уче́нием напо́яющая;

ра́дуйся, в мо́ри много́различных напа́стей погиба́ющим наде́жное пристани́ще.

Ра́дуйся, злосмра́дие страсте́й от приходя́щих к тебе́ прогоня́й;

ра́дуйся, от искуше́ний ми́ра, плóти и диа́вола ходата́йством твои́м свобожда́й.

Ра́дуйся, нераска́янных гре́шников к соверше́нному пока́нию воздви́зай;

ра́дуйся, лука́вая полчи́ща бесо́вская пресла́вне побежда́й.

Ра́дуйся, ран грехо́вных врачу́ благоиску́снейший;

ра́дуйся, сия́нием благода́ти Бо́жия ду́ши на́ша озаря́ющий.

Ра́дуйся, преподо́бне о́тче Севасти́ане, ве́ры Правосла́вныя испове́днице.

Конда́к 12

Благода́ть, от Бо́га ти да́нную, све́дуще, о́тче ми́лостивый, я́ко скоропослу́шлива ты приле́жно умоля́ем: вознеси́ дерзнове́нное моле́ние твоё ко Престо́лу Трои́цы Живонача́льныя, да сподо́бимся безпреткнове́нно преи́ти от земли́ на Не́бо; моли́ же, свя́те, Всеблага́го Бо́га и о гра́де твоём, и о святе́м хра́ме, егóже преподо́бническима рука́ма твои́ма созда́л еси́, и о хра́ме, в нёмже чудото́чныя мо́щи твоя́ почива́ют, да вси ве́рою, благоговéнием и стра́хом Бо́жиим воспева́ют Бо́гу: Аллилу́иа.

И́кос 12

Пою́ще дивна́я дела́ Бо́жия и промы́шление Егó о Це́ркви Ру́сстей, зрим О́птину пу́стынь, мно́гая ле́та в поруга́нии и разоре́нии бы́вшу, па́ки ны́не украси́вшуся и мо́щи цельбоно́сныя ста́рцев свои́х обрётшу; град Карага́нда оби́тели сей свесели́тся, стяжа́ бо сокрови́ще

себе, мо́щи еди́наго от собо́ра О́птинскаго; те́мже, чудя́щися, с
любо́вию тебе́, испове́днице, вопи́ем:

Ра́дуйся, Бо́га Отца́ Безнача́льнаго служи́телю избра́нный;
ра́дуйся, А́гнца Бо́жия Христа́ му́жественный испове́днице.
Ра́дуйся, Бо́га Ду́ха Всесвята́го хра́ме нерукотво́рный;
ра́дуйся, честно́е Пресвяты́я Трои́цы носи́ло и похва́ление.
Ра́дуйся, в невече́рном дни Ца́рствия Бо́жия почи́ваяй;
ра́дуйся, трисвяту́ю песнь со А́нгелы и все́ми святы́ми воспе́ваяй.
Ра́дуйся, заря́ми о́гненными благода́ти Бо́жия сия́яй;
ра́дуйся, я́ко свети́ло светоза́рное Го́рняго Ца́рствия блиста́яй.
Ра́дуйся, све́том благода́ти всех чту́щих па́мять твою́ просвеща́яй;
ра́дуйся, ра́я Иису́сова дре́во чудото́чное, мног плод на по́льзу
правосла́вным творя́щее.

Ра́дуйся, Виногра́да Христо́ва розго́ благопло́дная, пита́ющая нас и
веселя́щая;

ра́дуйся, Свята́го Правосла́вия непоколеби́мый сто́лпе и кре́пкое
утвержде́ние.

Ра́дуйся, преподо́бне о́тче Севастиа́не, ве́ры Правосла́вныя
испове́днице.

Конда́к 13

О́, преподо́бне о́тче Севастиа́не, ве́ры благочести́выя испове́днице
и кро́тости предивны́я сокрови́ще! Приими́ ны́не си́е в похва́лу твою́
от усер́дия на́шего приноси́мое благодарéние, и дерзнове́нным твои́м
хода́тайством испроси́ нам ве́ры непоро́чны соблюде́ние, ми́ра
умирéние, от гла́да и па́губы избавле́ние, грехо́в оставле́ние и
блаже́нныя вéчныя жи́зни насле́дие, да с тобо́ю и со все́ми святы́ми
поём ра́достно: Аллилу́иа.

Моли́тва

О́, пречестна́я и священна́я главо́ и благода́ти Свята́го Ду́ха
испо́лненная, Спа́сово со Отце́м обита́лице, ста́рцев О́птинских
учени́че и прее́мнице, гра́да Карага́нды светле́йшее украше́ние,
Казахста́нския страны́ богодарова́нный моли́твенниче, Це́ркви
Ру́сския па́стырю богопросла́вленный, си́рым и вдови́цам засту́пниче,
немо́щным врачу́ безме́здный, пра́вило ве́ры и благоче́стия,
преподо́бных сожителю́ и му́чеников соприча́стниче, богоно́сне о́тче
наш Севастиа́не досточу́дне! К тебе́ усер́дно прибега́юще, моле́ние
те́плое прино́сим: от сокрови́щницы твое́я пода́ждь и на́шему
убо́жеству; смире́нием твои́м на́шу горды́ню низложи́; безстра́стием

наша страсти попали; бодрствованием навык лени от нас отжени; слезными токи наше нечувствие пробуди; бдением от нерадения нас возстави; молитвами и в нас пламень молитвы возжзи; любовью нас братолюбны сотвори; подаждь же нам дух кротости и смирения, дух чистоты и благочестия; от страстей многонедужия нас свободи и ко истинному покаянию приведи. Ты бо во уме твоём непрестанно имел еси на Кресте Распешагося за нас Сына Божия, Того сладчайшее Имя во уме и в сердце непрестанно имети и нас научи, да любовь Тому пламенеюще, страшный оный день Судный сретити уготовимся, и в Царствие Небесное внити с тобою сподобимся, славити и воспевати Троиединую державу Бога нашего: Отца и Сына и Духа Святаго во веки. **Аминь.**